

TE HEEHURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti.
i te mau fenua Sotaiete, i te mau avae atoa
Te hoo e piti farane i te matahiti hoê.

Nu. 9.

Tetepa 1930.

Mat. 24.

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo"
i papaihia e Tamate Aposetolo; Faaauhia ei reo Tahiti e Elita.

HIRO'A FAAROO 13. *Te faaroo nei matou e, eiaha e
eia, eiaha e haavare, eiaha hoi e taiata, ei aaui marâ ra, e
te viivii ore, e te hamani-maitai-raa'tu i te taata atoa. E
ia na ô tatou i te faaiteraa'tu, te pee nei matou i te a'oraa a
Paulo, te faaroo nei matou, e tia nei hoi i te mau mea atoa
nei. Erave rahi te mau mea i faaoromaihia e matou, e te
hinaaro nei hoi matou e, ia itoitomatou i te faaoromai i te
mau mea atoa. E mai te mea te vai atura te hoê mau mea
tia ra, e te mau mea viivii ore ra, e te mau mea popouhia ra,
e te mau mea roo maitatai ra, e feruri maite â ia matou i te
reira. --Iosepha Semita.*

Uiraa 1. *Eaha te tumu i faatiahia'i taua huru faaroo
nei?*

P. *Ua haapii tatou no nia i te mau mea no te pae va-
rua: te mau peu e te mau ohipa moá no te Ekalesia a Iesu
Mesia. I teie nei râ ua tae tatou i te ohipa no te pae tino;
aita e faufaa no te haapaoraa tei haamanaó noa i te pae Va-*

rua anaé e tei vai iho i te taata ia haere oia i te eá ta'na i hinaaro mai te aratai-ore-hia. No reira te pee nei matou i te haapiiraa a Iakobo o tei na ô maira e, "O te paieti mau e te ino ore i mua i te aro o te Atua, o to tatou Metua ra, o teie ia, o te hamani maitai i te otare e te mau vahine ivi i to ratou ra ati, e te tiaí maitai ia'na iho eiaha ia viivii i teie nei ao." (Iakobo 1:27)

Uiraa 2, Eaha te rahiraa o te faaroo no te Ekalesia a Iesu Mesia?

P. Aita e hopea no te rahiraa o te faaroo no te Ekalesia a Iesu Mesia. Te farii nei matou i te mau parau-mau atoa noa'tu te vahi i tupu ai oia ra. Te faaroo nei matou i te haereraa i mua e a muri noa'tu e no reira ua pâpû roa te manaó e, te vai atura te parau-mau o tei ore ê â i faaitehia mai e no reira ia vai â te heheuraa e tia'i. Te faaroo atoa nei matou i te Atua o tei haere noa â i mua e no reira te haapii nei matou i te manaó e, "*Mai te taata i teie nei te vai ra te Atua i mutaa ihora; E nehenehe hoi i te taata ia riro mai te Atua ra i teie nei.*" Eita râ tatou e tae i to'na iho maramarama e To'na paari e a muri noa'tu, no te mea ia tae tatou i To'na huru i teie nei, ua haere atu â ia Oia i nia roa. Mai te mea râ e, e hinaaro tatou i te riro mai Ia'na te huru ia pee tatou i te parau a Paulo e tia'i. "E tapoi i te mau mea atoa ra, e faaroo i te mau mea atoa ra, e haamahu i te mau mea atoa ra." (Korinetia 13:7)

Uiraa 3. Eaha te ture matamua?

P. O te aroha ia. "Hinaaro oe i to Atua ia Iehova ma te aau atoa, ma to varua atoa, e ma to manaó atoa. O te ture matamua teie e te hanu i te rahi. E mai te reira atoa te piti: E aroha'tu oe i to taata-tupu, mai to aroha ia oe iho na." (Mataio 22:37-39) Ua parauhia teie na ture te matamua e te piti, area râ, ua fatata roa te auraa, e aita te taata

e aroha i te Atua maori râ, e aroha atoa oia i to'na taata tupu, e aita atoa oia e aroha i to'na taata tupu maori râ e aroha atoa oia i te Atua. A taió ia Ioane 4:7-8 e te 20-21.

Parau Tauturu: Ua papai Paulo i te hoé parau i to Korinetia no nia i te aroha, e tei roto te reira i te pene 13 no te Korinetia I. Te na ô maira te irava toru no taua pene e, "E ia horoa noa vau i ta'u mau taoá atoa, ei faaamu i te taata rii, * * * e aita o'u aroha, aita roa a'u e faufaa i reira."

Te vai ra te hoé ohipa aroha rahii roto i te Ekalesia a Iesu Mesia, oia hoi te poro-haère-raa'tu i te Evanelia. I te mau matahiti atoa nei ua tonohia'tu te hanereraa o mau orometua i tera vahi e i tera vahi e ati noa'é i te ao nei, na ratou iho ta ratou moni e aita e hoé pene i roaa mai ia ratou no te reira ohipa aroha; te na reira nei râ ratou no to ratou hinaaro ia faaroo to te ao nei i te parau no te Evanelia tei faa-hoihia maira i teie nei mau mahana hopea nei. Ua faaite-atua-hia te aroha no te taata na roto i ta'na tautururaa'tu i te feia veve.

Uiraa 4. E mea nahea te faatereraa i te ohipa tauturu i roto i te Ekalesia a Iesu Mesia i te Feia Moá i te Mau Mahana Hopea Nei?

P. E piti huru no te reira ohipa, oia hoi te moni horoa-noa-hia, e te moni haapaeraa maa. Ua horoa noa mai te taata ona i te moni mai tei au i to'na hinaaro, e ua haapuehia te reira na te feia veve. Te vai atoa ra te moni no te haapaeraa maa o te haapuehia no te reira ohipa, e mai te mea aita i navai te reira ua rave-atua-hia te tahi no roto mai i te Tufaa Ahuru. Te vai atoa ra i roto i te mau amaa te pûpû tuahine i parauhia te "Taiete Faaora" e ua tauturu noa ratou i te feia veve na roto i te maa e te ahu e te moni, mai te mea te vai ra te mai i roto i te utuafare, na ratou e tau-

turu i taua utuafare ra. Ua iteahia te ohipa maitai no taua Sotaiete ra e ua pee mai te tahi mau sotaiete mai te reira te huru e ati noa'é i te fenua i Amerika ra.

Ua faaterehia te piti o te raveraa mai teie te huru: I te Sabati matamua no te mau avae atoa ua haapae te Feia Moá i te maa ei faahaehaaraa ia ratou iho. I taua mahana ra e horoa mai ratou i te moni ia au i te horoaraa i ta ratou maa no taua mahana ra ahiri ua hoo mai ratou i te reira. Na te Episekopo no te amaa e haapao i te reira e na'nae aufau i te reira i te feia veve mai te au i te mea ta ratou i titau no te ora. E tauturu iho â te Ekalesia i te taata noa'tu e melo oia, e aore râ aita no te mea te faatura nei matou i te manaó e, ahiri aita tatou i aroha i to tatou taata-tupu aita atoa ia te Atua e aroha mai ia tatou.

(E Tuatihia teie nei parau.)

Ia Pohe, o te Hopea Anei Te Reira

I roto i te hoe oire rahi i Amerika, te poro haere ra te hoé orometua i te Evanelia a Iesu, e ua haere tamau oia i te mau poipoi atoa i te fare rata ma te manaó ra e, e tae mai te hoé rata na to'na mau hoa, e aore râ na to'na mau fetii. I te hoe poipoi ra, ua tae mai te tahi rata na to'na mama i te na ôraa mai e, "Tei roto i te fare maí to oe teina no te hoe maí opu, ua tapuhia e ua huru maitai oia i teie nei." E piti ahuru minuti i muri aé ua tae mai te parau ia'na e, "Ua pohe roa to oe teina."

I to'na otoraa i to'na teina i pohe, ua tae mai te manaó i roto ia'na, To'u teina o tei vai ihohia e au e hoé ahuru e ma ono avae aénei mai te manaó e, e farerei faahou vau ia'na, ua pohe râ oia. E ite faahou anei au ia'na? Ia pohe,

o te hopea anei te reira? Te reira te manaó i tae mai ia'na.

I teie nei, te uiraa ia na tatou, e ite faahou anei oia i to'na teina? Aita e nehenehe ia parau e, aita e ora mure ore, i te huru ra o to tatou ite te vai ra te ora i muri aé i teie ora. Te ite noa nei tatou i te mau ture api i roto i teie nei ao, e pâpû ia ia tatou, aita tatou i ite i te mau ture atoa o te varua.

A hió tatou i te ture no te haamou-ore-raa i te hoé mea. oia hoi, i te ture ra, aita e nehenehe ia haamou i te hoé mea, ua nehenehe ra ia faahuru ê i te huru mau o te mea, aita râ i nehenehe ia haamou i te reira. Ia paapaa te hoé raau i te auahi, e rave faahou tatou i te mau mea no te auahi; te orehu, e te auahi, e te veáveá, e ia feito i taua mau mea ra, hoé â to ratou feito e to te raau mau. E mai te mea ra e, aita i nehenehe ia haamou i te hoé mea, aita i hora ia te Atua e haamou i te varua o te taata, e taoá rahi atu â i te mau mea atoa tei hamanihia e Ana ra.

Ua parau maira Iesu, "Tei ia'u te tia-faahou-raa e te ora, o te faaroo mai ia'u ra, e ore roa'tu ia e pohe." Ua papai-atoa-hia te ite a te mau peropheta tahito e tae roa mai i teie tau hopea nei. Ua na ô maira o Iosepha Semita raua o Olive Kaudere, "Ua faatiaia te Fatu i to maua mata, e ua ara maua ma te ite, e ua maramarama te hanahana o te Fatu e ati noa'é, e ua ite maua i te hanahana o te Tamaiti i te rima atau o te Metua."

No reira, na roto i te ture e te ite o te mau Peropheta mai tei papaihia i roto i to tatou mau buka e te mau heheuraa tei heheuhia mai, e mea pâpû ia ia tatou, te vai ra te ora i muri aé i te poheraa o te tino. Te hinaaro nei tatou i te reira ora, e nahea e noaa ai ia tatou taua ora ra, maori râ, na roto i te haapaoraa i te mau ture e te mau faaueraa tei ho-roahia mai na tatou.

—*Papaihia e Harave*

E Mau Tamarîi Tatou Na Te Atua

O te Atua iā te metua mau no to tatou mau varua. Hou aé i to tatou fanauraahia i te tino nei, ua parahi tatou i pihai iho i te Atua i te huru varua. E feruriraa to tatou i reira, e ua haapii tatou, e ua roaa te ite ia tatou na roto i te ohipa ta tatou i rave i reira. Ua hinaaro to tatou metua, o te Atua, ia tupu to'na mau tamarîi i te maitai e ia riro ratou mai ia'na te huru. Ua tae atu râ tatou i te hopea o te mau ravea i te ao varua ia tupu â tatou i te paari e i te maitai e no reira, ua imi te Atua i te ravea ia haere â to'na mau tamarîi i mua.

Ua faatia oia i te hoé apooraa rahi e ua haaputuputuhia tatou i roto i taua apooraa ra. E faaite maira te Atua i te ravea ta'na i faaineine ia roaa â ia tatou te ite api. Ua faaite mai oia e, ua hamani oia i te hoé ao ra ei nia iho i te reira e tuu ai oia ia tatou, ia farii tatou i te tino e ia tamatahiahia tatou ia ite pâpû oia e, e mau taata haapao maitai anei tatou e aore râ aita. I roto i taua ihora apooraa ra ua maitihia to tatou taeae, oia hoi te tamaiti Fanau Tahî, o Iesu Mesia ei taraehara no tatou nei. Na'na hoi i faatia te Evangelia ei ravea ia ora te taata. Ua tuu atoa te Atua i te ino e i te maitai i nia iho i te ao nei. E ua horoa oia i te taata i to'na tiamâ ia maiti oia i te mea ta'na e hinaaro.

E to te Atua tamaiti, o Adamu te matamua iā i tuuhia i nia iho i te ao nei, e no reira, ua riro oia ei metua no tatou i te tino nei. Na roto i to Adamu hiāraa ua faatia oia i te ravea ia taatahia teie nei ao.

Aita roa e nehenehe i te taata ia roaa ia'na te oaoa mau, maori râ ua ite oia i te parau mau e no reira, ua riro to'na oraraa i ô nei mai te haapiiraa te huru, ia roaa ia'na te ite.

Ua tano roa te parau tei papaihia e te na ô maira e, "Ua hiá Adamu ia vai te mau taata, e te vai nei te mau taata ia roaa to ratou oaoa."

Na roto i te paari o to tatou metua ua moé ia tatou to tatou ite o te ao varua. E tae mai râ te tau e haamanaó ai tatou i te reira.

E rave rahi roa ta te Atua mau tamarii. Ua haere râ te pae rahi na roto i teie haapiiraa. Ua pohe ratou e te tia nei ratou i roto i te ao varua e tae noa'tu i te tia-faahou-raa a hoi mai ai ratou e farii i to ratou tino hanahana. Te vai nei â râ te tahi mau tamarii o tei ore â i farii i to ratou tino tahuti. Ia farii ratou i to ratou tino tahuti nei e ia oti i te mau tamarii atoa i te tamatahia, e haava'i Iesu Mesia ia tatou nei no te mea, na'na te Evanelia i faatia e ua tuu hoi te Atua i te ohipa haavaraa i roto i to'na rima. E haavahia tatou mai tei au i ta tatou mau ohipa. E ia oti te haavaraa e farii tatou i te vahi hanahana i roto i te Basileia o to tatou metua. E mea rahi te mau parahiraa i reira. E faaauhia to tatou parahiraa, mai tei au i to tatou haapao maitai a parahi noa'i tatou i nia iho i teie nei ao. E te tahi pae o te mau tamarii e ore ratou e farii i te hoé tufaa iti i roto i te basileia o te Atua. Ua parauhia ratou e mau tamarii o te pohe no ta ratou ohipa ino roa i roto i te tino nei. E iti râ ratou, tera râ e moe roa ratou i te Atua, e e tuuhia ratou i roto i te roto auahi i pihai iho ia Satani e i ta'na mau melahi.

E no reira, e homa, eiaha e haamauá i to tatou taime i te raveraa i te mau mea faufaa ore a parahi noa'i tatou i nia iho i teie nei ao. A imi râ tatou i te basileia o te Atua e e amui atoa-hia mai te mau mea maitatai e au no tatou nei.

—*Papaihia e Eduana*

TE VARUA AROHA

Ua fanauhia Farani i na metua maitatai i roto i te Ekalesia a Iesu Mesia i te Feia Moá i te Mau Mahana Ho-pea Nei. Ua haapiihia oia i te parau afaro no tó tatou Metua i te ao ra e ta'na ra tamaiti o Iesu Mesia, ua tonohia'tu oia i te haapiiraa Sabati, e i te haapiiraa no te pû-û tamarii, e i reira oia i haapiihia'i i te parau no Iesu, to tatou faaora, e ia paari rii oia ua haere oia i te haapiiraa no te feia api, e i te haapiiraa no te hau e haapii i te ohipa a te auvaha ture.

Tae aéra to'na matahiti i te ahuru ma iva, ua oti ia'na e piti haapiiraa, e ua oti atoa ia'na e piti matahiti i roto i te haapiiraa teitei. Ua opua maitai oia e faaoti oia i ta'na haapiiraa na te auvaha ture e i reira e noaa ia'na ta'na pereve rahi.

I te hoé po ua hoi mai oia i to'na utuafare e ua farerei oia i to'na metua vahine i te opani, e ua horoa'tu oia i te hoé rata ia'na ra, iriti aéra oia i taua rata ra, taió i hora i te parau i roto. Ua oti te rata i te taióhia, ua feruri maitai oia i te mau parau ta'na i taió, nânâ aéra to'na mata i nia, parau atura oia i to'na metua vahine na ô atura, "Ua maitihia hoi au ei orometua e poro haerei te Evanelia i te fenua Baratane." Na ô maira to'na metua vahine, "E haere anei oe?" Aita oia i pahono mai, ua feruri oia no ta'na mau opuaraa, e ia maoro rii, parau atura oia i to'na metua vahine, na ô atura, "Te tere maitai nei hoi ta'u ohipa i te haapiiraa e ua parau mai to'u orometua, e riro hoi au ei auvaha ture maramarama roa, e mai te mea e, e haere au e poro haere i te Evanelia ua faufaa ore ta'u mau opuaraa."

I te mau mahana i muri mai i te reira, ua haere oia i te haapiiraa e ua faaite oia i to'na mau hoa ra, ua maitihia oia

ei orometua, ua parau maira ratou ia'na na ô maira, "Eiaha oe e farii i te reira parau maamaa, e taata maramarama roa oe, a faaoti i ta oe haapiiraa nei." Ua parau atoa mai to'na orometua no te haapiiraa, "Eiaha oe e haere, a faaoti i ta oe haapiiraa e haapao i ta oe mau opuaraa."

Ua feruri maitai oia i nia iho i te mau parau ta'na i faaroo, e ua na ô ihora oia iho e, "Aore vau i ite e parau mau anei te Evanelia, tira ra, te faaroo nei au e parau mau hoi, e ere anei e tano ia haapao hoi au i ta'u e faaroo ra." Ua tauturuhia oia e to'na metua vahine, e i te hopea, ua farii oia, haere atura i te fenua Baratane.

I to'na taeraa i reira ua haapaohia te hoé pureraa autahuāraa no te mau orometua. Aore Farani i ite maitai i te auraa i te reira pureraa no te mea e, tei te fenua roa to'na manaó. Ia oti te pureraa, ua faataahia te mau orometua i to ratou mau vahi, e ua faataahia Farani raua te tahi orometua ia haere i te oire rahi o London. I to raua taeraa i reira, ua haamata raua i te opere i te tahi mau vea mai te faaite atu i te mau taata i te huru o te Evanelia. Ua auauhia raua e te tahi mau taata, e na te tahi mau taata i tapiri mai i te opani i mua i to raua aro, tae aéra raua i te fare no te hoé orometua no te tahi haapaoraa ê e i reira ua auauhia raua mai te faainohia i to raua haereraa.

Ua na ô atura Farani i to'na hoa, "E hoa, e mahana ino roa teie, ua faaino-noa-hia taua".

Ua parau atura to'na hoa ia'na, "E ere i te mea ino roa, a tia i rii oe, auanei ia po e haapaohia te hoé pureraa i nia iho i te poro o te mau purumu ei reira oe e ite ai i te huru o te faaino."

Haere atura raua e tamaa, e ia oti, ua haere raua i te poro no te mau purumu i haapaohia no te pureraa, e i reira hoi raua i farerei ai i te tahi na orometua e toopiti, e ua amui ratou. Ua haamatahia te pureraa na roto i te hoé reó himene

i himenehia e te mau orometua, e ia oti, ua pure te hoé o ratou, tia aéra te hoé o ratou i nia, aó atu i te parau, ua aó noa oia i te parau no na minuti e piti ahuru, e i reira oia i faahiti ai i te hoé parau pâpû no te Evanelia, ua haapuai ihora te hoé taata i to'na reó i te faahaparaa i te parau a te orometua ra, maniania aéra te tahi pae. Aore te orometua i faaea i ta'na aóraa, no reira, ua faaino mai te mau taata ia'na. Ua faaroo te mau mutoí i te maniania, haere ihora ratou i reira e haamamu i te mau taata.

Ua faaoti teie orometua i ta'na aóraa, e ua tia aéra te tahi i nia, aó atu i te parau, e ia oti ta'na aóraa, ua mataú roa Farani i te mea ua manaó oia e, e horoahia te tahi aóraa ia'na, aore oia i ite e nahea oia i te aó atu i te parau. Aita râ oia i anihia, ua hió aroha'tu to'na hoa ia'na.

Ua faaotihia te pureraa na roto i te pure, e ua haere te mau taata i to ratou iho mau fare. Ua fatata aéra Farani raua to'na hoa i to raua fare, ua parau maira Farani, "E mau taata iino roa tera."

Pahono atura to'na hoa, "E ere i te mea ino roa, e mea maitai roa ratou i teie po."

Ua tae atura raua i te fare, e ua faaineine raua no te taotoraa, haere ihora raua i nia iho i to raua roí ia taoto, o Farani râ, aita oia i taoto, ua tahirihuri noa râ oia i nia iho i te roí mai te feruri i te mau mea i tupu i taua mahana ra. I muri iho, ua haamanaó oia i te hoé mea, taoto ihora.

Ia poipoi aéra, ua tia oia i nia, na ô atura oia i to'na hoa, "Ua noaa ia'u te hoé haapiiraa na roto i te ohipa o tei tupu mai inanahi." Parau maira to'na hoa, "Faha te haapiiraa i noaa ia oe nei."

Ua pahono maira Farani, "Teie ia: Te vai noa ra na mana ite-ore-hia e piti. Te matamua, e varua aroha ia, o tei tauturu i te mau taata maitatai i roto i ta ratou ohipa parau tia. E te piti, e varua ino ia o tei tauturu i te mau taata o tei faaino i te parau tia. E tei te pae o te varua aroha e te parau tia hoi taua, ua pâpû roa ia'u te reira."

Ua na ô atura to'na hoa ia'na, "Oia mauia, e toopiti e tia'i ia rê i roto i te tama'i no te parau mau; O oe e to Fatu."

Na roto i teie nei parau ua noaa ia tatou te hoé haapiiiraa rahi roa. Teie ia; Eaha te tumu aita te tahi mau taata i haamori i te Atua? Teie hoi; Aita ratou i ite ia'na i te hoé vahi iti aé.

Eaha te faufaa ia tiaturi i te Atua? Teie ia; Ia nehe-nehe ia tatou ia haamori ia'na.

Eaha te faaauraa i ropu i te tiaturiraa i te Atua e te haamoriraa Ia'na? Teie hoi te faaauraa; Ia tiaturi tatou i te Atua e ti'ai no te haamoriraa ia'na. Mai te mea e, eita tatou e tiaturi ia'na eita i hora tatou e haamori Ia'na.

No te aha i haamaitahia'i te feia o tei imi e o te hiaai i te paraa mau? No te mea e, ia imi ratou Ia'na e itehia Oia e ratou ra, e i reira ratou e tiaturi ai Ia'na ra, tia roa i hora to ratou haamoriraa Ia'na, e e haamaitai maira Oia ia ratou, e i reira te ohipa a te taata e manuia ai i te mea, oia i tauturuhia e te Atua.

—Papaihia e Edua

Te Mau Parau Apî

TE ATI RAHI O TE PAHI RA O "TAHITI"

Te pahi vea o "Tahiti" tei tere pinepine na nia i te moana mai Amerika e tae roa mai i Tahiti, e mai Tahiti e tae roa'tu i Autararia, a hoi faahou mai ai oia mai Autararia, ua tomo roa oia. Mai te vahi i tomo ai oia e Rarotonga e 460 maile te atea.

A ite ai ratou te tomo ra te pahi ua taniuniu ratou i te tahi mau pahi e ua farii te hoé pahi o Ventura, to'na i'oa, i ta ratou niuniu i te aniraa'tu ia faaora ia ratou. E no reira na haavitiviti i hora te pahi ra Ventura ia tae atu oia i

pihai iho i Tahiti ia faaora oia ia ratou. Ua tae oia i reira e ua faaora oia i te mau taata atoa i nia iho i Tahiti. E toru hanere e hoé ahuru e ma hitu taata tei ravehia mai no nia mai i Tahiti. I muri iho i to ratou faarueraa i te pahi ra Tahiti ua tomo roa ia. Ua tae atura te pahi Ventura i te motu ra i Pagopago e ua haere te mau taata i uta i reira. I muri mai râ ua faarue ratou i Pagopago e ua tere â ratou paa-toa e tae roa'tu i te fenua ra i Vaihi, e i reira ua fariihia'i ratou mai te oaoa.

AUEUERAA FENUA I ITALIA

Ua tupu te tahi mau ati rahi i te fenua ra i Italia. I te 23 no Tiurai ua haamata te aueueraa fenua i te pae i apatoa i te fenua Italia. E vanu ahuru e ma pae oire tei farii i teie ati rahi. Ua tae atoa te reira i Roma, i te oire râ i Naples e e ati noa'e i taua vahi ra te aueue-puai-raa o te fenua. No te aueueraa o te fenua ua topa te mau fare e rave rahi i raro o tei haapohe i te mau taata i roto ra. I te 24 no Tiurai ua tupu â te aueueraa fenua i te rahi e ua tupu atoa te hoé puahiohio rahi tei tauturu i te haapohe i te mau taata e haaparari i te mau fare. I muri mai ua haamata atoa te apoo auahi i roto i te hoé mouá i te tuu mai i te auahi, e no te veáveá o te auahi ua tahe te mau ofai e ua tapoí te reira i te fenua e ati noa'é i taua vahi ra mai te paapaa i te mau mea atoa ta'na i farerei. I te 25 no Tiurai ua tupu te tahi ati mataí, e e rave rahi te mau taata te pohe i te reira.

Ua fatata e 3,000 tino pohe tei itehia e ua manaó ihora te tahi mau taata e tae te rahi i te 4,000 taata pohe. Ua fatata te taioraa o te mau taata pêpê i te 5,000. No te aueue-puai-raa o te fenua e faahuru-ê-hia te hohoá fenua mata-mua o te pae i apatoa o te fenua Italia.

M. Bonnet M. Gerant et Imprimeur,
Rue Brea et de la rue Dumont d'Urville, Orovini, Papeete